

長沙縣志卷之三十二

仙釋

儒者恥譚二氏至欲人其人火其書廬其居今

純陽呂祖仙師已於嘉慶九年

奏准列入祀典至若釋氏一宗則固

高宗純皇帝所惻然不忍廢者也伏讀

御製詩序曰有以沙汰僧道為請者朕謂沙汰何難即盡去之不過

一紙之頒天下有不奉行者乎但今之僧道實不比昔日之橫恣

有賴於儒氏辭而闢之蓋彼教已式微矣且藉以養流民分田授

井之政既不可行將此數千百萬無衣無食游手好閒之人置之

何處故為詩以見意云頽波日下豈能迴二氏於今亦可哀何必

長沙縣志

卷之三十二

仙釋

關邪猶泥古畱資畫景與詩材大哉

王言恩同覆載二氏之教真不足以惑世誣民法苑珠林聊供詞人

藻繪已耳志仙釋

舊小序

漢

智益姓吳本征蠻卒平生以獵釣為業得白龜食之徧身生

瘡潰爛痛苦號叫鬚眉手足指皆墜落未即死乞於安南市

有僧見而哀之曰汝可迴心念大悲真言吾當口授若能精

進必獲善報卒依其言受之一心念誦後瘡痍漸愈手足指

復生遂削髮為僧於伏波將軍宅建精舍住持

晉

青蓮僧潭州門內街北青衣寺有僧誦法華經時感二青衣

童子侍奉後死葬塚上生二蓮花看之乃自舌根生因建寺以青衣名勸善書云建興二年長沙縣西百里有青蓮花兩本生陸地掘其地丈二尺得二瓦棺蓮出棺破處剖棺視之有髑髏拴索蓮根生齒閒說者云有僧誦蓮花經十萬部無疾而化遺言衣經服以瓦爲棺卽此也

按後漢後主有年號建興西晉愍帝亦年號建興通志府志編入蜀漢時舊志編入晉時今仍舊志

陶淡太尉侃之孫少孤好道餌靈草辟穀研窮易卜結廬長沙臨湘山一白鹿與居三白鶴常侍左右與姪鍊形尸解遺蛻俱存今榔梨市考東坡集云晉史隱逸傳陶淡字處靜太尉侃之孫也父夏以無行被廢淡幼孤好導養之術謂仙道

長沙縣志

卷之三十二

仙釋

二

可祈年五十六便服食絕穀不娶家累千金僮客百餘淡了不營問好讀易善卜筮於長沙臨湘山中結廬居之養一鹿以自隨人有候之者輒移渡澗水莫得近州舉秀才淡遂逃羅縣埤山中不知所終陶士行諸子皆凶暴不獨夏也而諸孫中乃有淡曾孫中乃有潛潛集中乃有仲德敬通之流皆隱約有行義又皆貧困何也淡高逸如此近類得道者歟潛近親而潛無一言及之此又未喻也戊寅九月七日閱晉史

偶錄之以俟知者儋州城南記此可爲真人之證

善化李文炤陶真人

贊附 神仙之說自古有之彭祖商容老聃遞相授受更歷三代其象著於大易其法備於陰符班班可考也蓋萬物之生負陰而抱陽冲氣以爲和迨七竅鑿而渾沌死矣爲仙術者有內丹以固其性情則太初爲鄰有外丹以鍊其魂魄則金石不朽故獨得深根固蒂長生久視之道乃列莊之徒遂張大其說以與內聖外王之道相抗衡則過矣陶氏之先有

桓公者才足以克復神州力足以匡天下不幸而有志未伸然猶功在社稷澤被生民以故其後世每多賢裔若靖節先生者雖列之古逸民中亦無愧焉吾鄉榔梨市有守靜真人諱淡字處靜與其姪鍊形尸解遺蛻尚存相傳以爲桓公之曾孫也夫以公侯世胄而辭榮耽寂豈有感於溫元循裕之擾攘遂長往而不悔與蓋君子藏器於身必兼善天下而後謙於志故靖節亦云如彼稷契孰不願之然或時命大謬而又不得大聖大賢以爲之依歸遂激而爲方外之學非得已也陳眉公云既爲男子有與草木俱灰漏盡英雄乃以神仙退步旨哉言乎顧世俗徒以衝舉拔宅之說相矜夸斯淺之乎爲見矣予家去真人宇二十餘里每瞻遺像不勝慨然昔屈大夫作遠遊之篇朱晦翁訂參同之簡古之人諒亦有同情也夫

謹按陶淡於國朝咸豐二年

敕封孚佑真人其姓名烜字太仁

敕封福佑真人

唐

長沙縣志

卷之三十二

仙釋

三

法華禪師初住嶽麓清風峽建有石塔基址尙存後飛錫湘春門外接眾說法值異人願捨鐵造佛訪之乃衡山王神也師擲錫卓地得鐵數百鈞遂冶鑄佛三塔一名鐵佛寺隨還嶽麓示寂

緜仙姑入道居衡山年八十餘容色如少於魏夫人仙壇修香火十餘年孑然無侶精虔戒律壇側多虎皆馴服數年後有青鳥如鳩鴿紅頂長尾飛來語云我南嶽夫人使也以姑修道清苦獨棲窮林命我爲伴他日又言西王母姓緜乃姑之祖聞姑修道勤至將有真官降而授道宜亟修勵每有人遊山必青鳥預說姓字又曰河南緜氏乃王母修道之故山又一日青鳥曰今夕有暴無害勿怖也其夕果有十僧人持

火挺刃將害仙姑入其室姑在牀上不能見果無害歲餘青鳥言應遷居因徙居湖南烏亦隨之鄭畋自學士左遷梧州師事姑姑謂畋曰此後四海多難人閒不可久居吾將隱九嶷矣遂去

懷素姓錢字藏真陸羽撰云疏放不拘細行飲酒以養性草書以暢志酒酣興發寺牆里壁靡不書之貧無紙乃種芭蕉萬株以供揮灑又以漆盤一方書之未幾兩板皆穿自云得草書三昧棄筆堆積埋山下曰筆塚

見國史補

其自序曰懷素長

沙人幼而事佛經禪之暇頗好筆翰然恨未能遠睹前人之奇跡所見甚淺遂擔笈杖錫西遊上國謁見當代名公錯綜其事遺編絕簡往往遇之豁然心胸略無疑滯魚牋絹素多

少塵點士大夫不以爲怪焉顏刑部書家者流精極筆法水鏡之辨詳在末行又以尙書司勳郎盧象小宗伯張正言曾爲歌詩故敘之曰開士懷素僧中之英氣慨通疏性靈豁暢精心草聖積有歲時江嶺之閒其名大著故吏部侍郎韋公陟睹其筆力勗以有成今禮部侍郎張公謂賞其不羈引以遊處兼好事者同作歌以贊之動盈卷軸夫草稟之作起於漢代杜度崔瑗始以妙聞迨夫伯英尤擅其美羲獻茲降虞陸相承口訣手授以至於吳郡張旭長史雖姿性顛逸超絕古今模楷精詳特爲真正真卿早歲常接遊屢蒙激昂教以筆法資質劣弱又嬰物務不能懇習迄以無成追思一言何可復得忽見師作縱橫不羣迅疾駭人若還舊觀向使師得

親承善誘函挹規模則入室之賓舍子奚適嗟歎不足聊書此以冠諸篇首其後繼作不絕溢乎箱篋其述形似則有張禮部云奔蛇走虺勢入座驟風旋雨聲滿堂盧員外云初疑輕煙淡古松又似山開萬仞峯王永州邕曰寒猿飲水撼枯藤壯士拔山伸勁鐵朱處士遙云筆下惟看激電流字成只畏盤龍走敘機格則有李御史舟云昔張旭之作也時人謂之張顛今懷素之爲也余實謂之狂僧以狂繼顛誰曰不可張公又云稽山賀老粗知名吳郡張顛曾不易許御史瑤云志在心奇無定則古瘦灘醜半無墨醉來信手兩三行醒後欲書書不得戴御史叔倫云心手相師勢轉奇詭形怪狀翻合宜人人欲問此中妙懷素自言初不知語疾速則有竇御

史冀云粉壁長廊數十間興來小豁胸中氣忽然絕叫三五聲滿壁縱橫千萬字戴公又云馳毫驟墨列奔駟滿座失聲看不及目愚劣則有從父司勳員外郎吳興錢起詩云遠錫無前侶孤雲寄太虛狂來輕世界醉裏得真如皆辭旨激切理實元奧固非虛蕩之所敢當徒增畏愧耳時大厯丁巳冬十月二十有八日

慧朗一統志參馬祖有悟居招提寺時稱大朗又有振朗參石頭有悟居興國寺稱小朗皆長沙人

洪諲一統志嘗與數耆宿至襄沔闕一僧舉論宗乘頗敏捷論說不已洪諲語曰參須實參悟須實悟闍羅大王不怕多語僧拱而退

如海一統志周氏子曾爲成都主簿後爲僧晚居長沙在定十四日人卽其處而成室宇遂爲寶應寺去至湘西人又從之負木礮石爲龍安寺柳宗元爲之碑

尙顏楚風補長沙僧按紀事上人與陸龜蒙方干陳陶倡和亦唐末名僧也齊已有寄尙顏上人勗居詩云麓山南面橘洲西

釋夷齊楚風補少從長沙雲蓋智禪師出家執事首座一日秉拂罷齊問曰某聞首座所說莫曉其義伏望指示座諄諄誘之使究無著說這箇法逾二日遂有省座駭然後徧參至石門印契示寂云昨夜三更過急灘灘頭雲霧黑漫漫一條拄杖爲知己擊碎千山與萬山

長沙縣志

卷之三十二

仙釋

六

齊已詩話潭州人與貫休并有聲同師石霜二僧唐之尤晚者已詩如夜過竹林寺醉打老僧門最佳

宋

景岑一統志長沙人嘗言我若一向舉揚宗教法堂前須草深一丈事不獲已爲汝諸人道舊志初住嶽麓爲一世其後居無定所但循緣接物隨宜說法時謂爲長沙和尙太宗至道三年示寂府志同 本朝雍正十二年封洞妙朗淨禪師

按宋景岑禪師曾養靜於思古台至道本宋太宗年號通志編入唐詩疑誤

洪蘊本姓藍父母初以無子專誦佛經生蘊年十三出家於開福寺習方技書湯劑精至尤工診切後遊汴以醫術知名

太祖召見賜紫方袍號廣利大師咸平初補右街首座累轉左街副僧錄

劉跛仙太平興國中人遇呂祖於君山得靈龜吞吐之法功成歸隱嶽麓自號瀟湘子常侍呂祖往來抱黃呂祖數遊城下有詩曰我愛瀟湘境紅塵隔岸除南山七十二惟喜洞真虛後有鄭思者遇跛仙於清泉門外相與俱仙去

慧覺禪師智度寺僧呂祖南遊韶郴下湘潭至江濱聞智度寺慧覺禪師性源滄潔與促席對坐謂曰師收光內照一衲之外無餘衣一鉢之外無餘食達生死岸破煩惱殼方今佛衣寂寂無傳禪理懸懸欲絕扶而興者其在吾師乎贈之偈曰達者推心方濟物聖賢傳法不離真請師開說西來意七

長沙縣志

卷之三十二

仙釋

七

祖於今未有人

今智度寺有洞賓巖

希白字寶月作書有晉人風度慶曆中嘗以涪化閣帖模刻於潭之郡齋蜀人秦子明練兵長沙因買石摹寶月古法帖十卷載歸黔江

濟川居士府志宋人也姓馮名楫少不娶妻刻志苦學遊上庠中魁授給事身在仕途不忘佛學居龍門從佛眼授道常宴坐不卧人以馮長老稱之隻身居官無家室童僕所得月俸盡買梵書紹興中帥長沙俄報相知期以十月三日報終至日令後廳設高座見客如平時日午夜冠望闕肅拜請漕使攝郡事登坐而化

陳楠府志號翠書博羅人以盤籠篋桶爲生後得太乙刀圭

金丹法景霄大雷浪書能救病禱雨遇盜殺之三日復甦遊
長沙衝帥節執送邕州獄數夕又回長沙中夜食水銀越宿
成白金以丹法授白玉蟾嘉定閒入漳水解去有葛縣尉在
甯鄉見之

周福縛竹爲庵讀梵書不求甚解戒律精嚴以苦行爲禪未
嘗剽竊語錄作野狐禪態一日諭其徒曰吾將火化入山拾
柴堆至五六丈許沐浴畢端坐其上其徒舉火咸爲股栗福
朗朗誦經火益烈木魚不輟口授諸徒遇大旱可呼我名當
爲霖以濟其後屢禱必應人於風雨中遙聞經聲木魚聲如
火化時嘉慶丁卯夏大旱官吏齋戒祈禱禁止屠宰七月七
日縣躬詣黑麋峯行香

周福得道處詳山志

輿未入城甘雨隨之初十

長沙縣志

卷之三十二

仙釋

八

日雨如注涸者盈槁者起初鄉民迎請神牌設壇祈雨六月
之四日有嬰兒精悍而黝黑巡壇呼曰明日大雨眾不以介
意次日巳刻遙望黑麋峯頂有雲觸石起頃之雷電交作白
鳥先行雨隨所至降宰殺如故者竟無雨後詢之各壇皆然
乃知爲神佑云

按周福舊志未註何時人通志府志俱載宋時人或云明
萬曆時人未知孰是同治六年

勅封普佑真人

在菴府志幼穎慧梵經墳史過目不忘因亂棄功名落髮壽
隆山徧參名宿拈偈有得住錫長沙高峯寺大暢宗風巴陵
無等大梅松竹等處爭迎恐後後主智度平居運畚塹土質

樸無文及登壇樹拂出入百家懸河莫遏尤工吟咏俯視齊
已輩或曰其先通城人俗姓楊父伯先官武昌都閩幼喜佛
出家然其詩有曰雲溪舊有家聲在則浙人也登鳴鳳臺詩
曰秦檜孫枝猶有綠曹瞞臺榭不經秋其他寄感甚多則上
人必有所託而然也

梁野人名戴父兄業儒獨戴慕逍遙得鉛汞修鍊術晝寢三
清殿夢金人丈餘提左手以一金錢按之戒曰汝欲錢但縮
左手於袖中隨取多寡寤覺左臂微痛隱有錢痕試果驗後
益放曠嗜酒遊方外十二年諸兄顏守廬州戴謁之顏見悲
喜飲之酒曰吾爲邦伯弟藍縷令換衣冠戴曰山林風致惟
事內觀何索我形骸外卽出寄旅邸醉卧夜半有錢聲主驚
窺之無所睹旦伺其出錢堆半壁上有書貽太守曰弟野人
不果奉辭惟冀珍重錢煩周恤貧乏仍遺所著敝衣異香襲
人殆非世所嘗聞驗其去踪乘空而升不知所往

李開府志字碧眼師爾占和尚得嗣法住石霜寺能詩文
元

易公仙父老相傳居霧陽鄉影珠山下壯年時惟執畚修路
巖上鐫至治壬戌易公修路八字今尙存及老結茅官道旁
織草履易食有餘則以惠人不求直日負稈於坐旁焚之且
織且燒盛暑不廢人間輒以寒暑疾對如是數年晝夜不輟
一日稈煙不散結爲白雲乘之而去今名其地爲草鞋灣曰
易公仙後人立石屋祀之早年祈禱輒應

李公兄妹府志元時長沙縣五十七都人父老傳公與妹俱從周野仙學道精於養氣鍊形道成屍解今李公肉身建祠在水渡下有淵潭歲旱禱雨輒應一方賴之道光五年

勅封廣濟真人咸豐三年

勅封廣濟宣威真人其妹肉身建祠在石飛嘴名娘娘廟

按湖廣通志石飛亭仙女長沙李氏女生而能言自云麻姑化身宅後有飛來石年十二遊其下拾一桃食之遂不食人間煙火構亭於石上日坐蒲團年三十六仙去肉身猶存有商張某過洞庭遭風覆舟忽一女子駕小艇救之張問從何來曰吾家長沙石飛亭昨來會湘君適見汝溺故亟援爾張心異之訪至石飛亭爲立廟祀焉舊志未載

長沙縣志

卷之三十一

仙釋

十

今查李真人妹遺蛻在萬壽都石飛嘴卽府志所載娘娘廟也舊志載靈蹟庵亦註在萬壽都石飛嘴而湖廣通志載石飛亭想日久亭圯故仍稱爲石飛嘴爾 又按仙女白道光以來迭顯靈異水旱蟲蝗祈禱輒應咸豐丙辰年粵匪回竄高橋勢將直下忽望石飛嘴一帶旗幟紛紜賊疑有備立即遁去居民乃安他如現身水陸軍營暗中默助起沈疴除巨寇不一而足廟前柱聯有江上息風濤力拯危舟春滿洞庭八百里雲中排甲馬膽寒巨寇福蔭長沙十萬家紀實也

明

向希升字曙菴溆浦人洪武初年來長沙止於新康都花山

嶺歲早求雨輒應沒後土人建寺祀之 國朝同治三年

敕封普佑真人

釋明照楚風補字元鑑一字別山黃陂阮氏子早值亂離薙髮爲僧性高潔工詩文初住西園於茅坪湘潭諸處登講座後卓錫長沙龍泉寺與襄陽袁負稱莫逆交著有衡嶽唱和諸詩及櫟堂詩集

瞿真人名殄苓萬曆時人年七歲出家古華山寺後修真集龍山 國朝順治八年七月十三日集薪白沙河邊沐浴舉火端坐誦經風雷大作須臾身化是年八月肖像於集龍山寺祀之每遇早年祈禱輒應同治六年

敕封溥護真人

長沙縣志

卷之三十二

仙釋

十一

國朝

釋衍義號湛修原住長安薦福寺康熙癸亥卓錫泐潭寺時寺荒廢湛修一新之淡寂自如大闡宗旨王潞贈詩云湛公聞道早光霽氣如春六字消長晝千秋上人綠莎侵砌古紅樹出簷新竹下叨清話高懷拂遠塵

僧寄塵彭氏子也幼誦佛經卽會其旨旣長工書畫喜吟咏袁子才枚取其淨壇風掃地清課月爲燈之句刻入隨園詩話凡所駐錫處隨地易名居粵曰廣麓居衡曰衡麓居長沙之鐵佛寺曰湘濱寄塵又號八九山人常以琴棋書畫詩酒自娛與達官文士相酬唱晚遊吳復如聞客某將軍幕府無疾而化遂葬其地閩人題其碣曰楚南僧寄塵之墓